

TE HEEHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau a'ae atoa.
Te hoo e piti farane i te matabiti hoê.

Nu. 4.

Eperela 1929.

Mat. 23.

"E o teie ta'u a'o ia outou na, ia itea teie nei mau parau ia outou, e ui atu i te Atua, i te Metua mure ore ra, i te i'oa o Iesu Mesia e, e parau mau anei teie mau parau, e aore anei; e ia ui atu outou ma te aau hinaaro mau, ma te mana'o papu, e ma te faaroo i te Mesia, na'na ia e faaite mai i te parau mau ia outou na roto i te mana o te Varua Maitai:"

"E na roto i te mana o te Varua Maitai e ite ai outou i te parau mau i te mau mea atoa ra." (B. M. Moroni 10:4,5)

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo" nei papaihia e Tamate Aposetolo; Faaauhia ei reo Tahiti e Elita.

HIRO'A FAAROO 8. * * * *E te faaroo atoa nei hoi matou e, e te Buka a Moromona ra, o te parau mau ia a te Atua.*

(E tuatiraa teie nei parau.)

TE MAU PARAU HAAPAPURAA NO TE BUKA A MOROMONA.

UIRAA 1. Eaha na tumu e pae tei haapapu mai i te taata e, ua tia ia ratou ia faatura i te Buka a Moromona?

P. 1- Te faaauraa i te Buka a Moromona e te Bibilia.

2- Te faaâraa i te tahi mau tohuraa tahito no nia i te Buka a Moromona.

3- Te faaauraa i te Buka a Moromona ia'na iho.

4- Te parau mau i hiôhia i roto i to'na mau tohuraa.

5. Te mau mea i itehia i teie nei mau mahana i te fenua Amerika tei haapapu mai e, te ora ra te hoé feia tahito i taua fenua ra mai tei faaitehia i roto i te Buka a Moromona.

Uiraa 2. E mea nahea te faaauraa i te Buka a Moromona e te Bibilia?

P. Tei roto i te Buka a Moromona te tahi mau parau mai tei roto atoa i te Bibilia. Ua iritihia teie nei parau no roto i te mau api veo ta Lehi ma i afai mai, mai Ierusalema maira, e te vai nei te reira mau parau i roto i to tatou Bibilia.

Ia faaauphia te mau parau tohu i roto i te Buka a Moromona e te Bibilia no nia i to Iesu fanauraahia i roto i te ao nei, e te tahi atoa no 'To'na haere-piti-raa mai; e te tahi no to Iseraela haapurara-ê-raa-hia e to ratou haaputuputu-faa-hou-raa i te mau mahana hopea nei. Ua itehia e, aita te hoé e patoi i te tahi e ua faaau maitehia raua e piti.

Uiraa 3. Eaha te mau tohuraa tahito i faaâhia na roto i te taeraa mai o te Buka a Moromona?

P. Ua na ô maira Davida e, "E tupu mai te parau mau no roto i te fenua, e hiô mai hoi te parau-tia mai te raî mai". (Salamo 85:11) Ua na reira atoa maira Isaia i roto i te pene 45:8. Ua ite atoa Ezekielia i te faariroraa i te raau na Iuda e te raau na Iseraela ei hoé. "Ua tae maira hoi te parau a Iehova ia'u nei, na ô maira, E rave â hoi oe, e te tamaiti a te taata na, i te hoé raau, a papai ai i nia iho, Na Iuda e na te tamarii a Iseraela, o to'na ra mau hoa, e

mai reira hoi, a rave ai i te tahi raau, a papai ai i nia iho, Na Iosepha, te raau na Epheraima, e te utuafare atoa o Iseraela, o to'na ra mau hoa; a taati atu ai i te tahi i te tahi ia hoé â raau; e ia riro ei hoé i roto i to rima na." (Ezekiela 37:15-18) I taua taime ra te papaihia ra te mau parau i nia iho i te parau i tavirihia i nia iho i te raau e no reira ua riro te reira raau ei buka. Teihea atu â te raau a Iseraela maori râ te Buka a Moromona? E o vai te raau a Iuda maori râ o te Bibilia. No te mea na te Ati Iuda i papai te Bibilia; e na Nephi ma i papai te Buka a Moromona, e no ô maira Nephi ma i te Ati Iseraela, na roto ia Manasa raua Epharaima. O Isaia atoa ia te tahi tei tohu mai no te reira a na ô mai ai oia ra e, "E ua riro taua orama atoa ra mai te parau i roto i te buka piahia ra ia outou; peneiaé ia tuuhia'tu i te taata ite i te taió parau ra, a na ô atu ai, A taió na oe i tera ra buka; te parau maira oia, Eaha e tia'i ia taió, tei piahia;" (Isaia 29:11) Ua tupu mau te reira na roto i te raveraa o te hoé taata mai tei faaitehia i roto i te parau tauturu no te uiraa 5 i te hiroá 8 no nia i te Buka a Moromona.

Uiraa 4. E mea nahea te faaauraa i te Buka a Moromona ia'na iho?

P. Mai te parau tuatapaparaa o taua Buka nei, ua ite tatou i te huru no to'na papairaahia, oia hoi, ua papaihia oia i te area ra e hoé tausani matahiti, ia vaiihohia te Buka a Et. ra, e na vetahi ê mau peropheta te reira i papai i to ratou iho anotau. Aita ra te hoé no ratou i patoi i te parau na te tahi e noa'tu e, ua huru ê te papairaa o te tahi e te tahi te vai ra te mau manaó afaro roa te tahi i te tahi i roto i to ratou papairaa atoa.

Uiraa 5. Eaha na huru tohuraa e piti e vai nei i roto i te Buka a Moromona, e nahea raua i te haapapu ai i te parau mau o taua buka nei?

P. Tei roto i te reira te mau tohuraa i faaîhia i te tau i papaihia'i taua buka ra. E te tahi atoa huru e tei ore i faaîhia i taua taime ra, area râ ua faaîhia te tahi pae no ratou na muri mai e te faaîhia nei te tahi, e e faaîhia te tahi na mua ia tatou nei. Na roto i te tupuraa i te tohu e ite ai tatou i te tohuraa mau e te tohuraa haavare.

Parau Tauturu: Ua riro tei mau tohu tei papaihia na mua i te tupuraa ei haapapuraa i te parau mau. Ua tohuhia na te parau no to Iesu fanauraa mai, e no to'na poheraa, e no to'na fanauraa mai i muri'ho i te tia-faahou-raa, e ua tupu te mau parau tohu mai tei au i tei papaihia i roto i te Buka a Moromona ra.

E rave rahi hoi te mau tohuraa i papaihia no te taeraa mai o te Buka a Moromona i te mau mahana hopea nei. "E faatupu hoi au i te tahi hió no roto mai i te huaai o to oe tauupu; e e horoa'tu hoi au i te mana ia'na ia faatupu i ta'u parau na te huaai o to oe ra tauupu; e te na ô maira te Fatu, eiaha i te faatupuraa i ta'u parau anaé, i te faaitepapuraa râ ia ratou i ta'u parau i parauhia na i rotopu ia ratou ra. E teie nei, e papai te huaai o to oe ra tauupu, e e papai hoi te huaai o to Iuda ra tauupu, e ta te huaai o to oe ra tauupu e papai, e ta te huaai hoi o to Iuda ra tauupu e papai e tupu apiti atoa ia i te faaoreraa i te parau hape, e i te faaoreraa i te parau mârô ra, i te faatiaraa i te hape i roto i te huaai o to oe ra tauupu, e i te aratairaa ia ratou i te ite i to ratou mau metua i te mau mahana hopea ra, e i te iteraa hoi i ta'u ra mau faufaa, te na reira maira te Fatu." (II Nephi 3:11-12)

Te haapao noa maira te Atua i ta'na parau na roto i te parau i na ite e piti, te na ô maira Oia e, "Eaha outou e amuamu ai, i te mea e roaa â ia outou ta'u nei parau? Aore anei outou i ite e, ua riro te faaite a na fenua e piti ei faaite ia outou e, o vau nei o te Atua, e hoé â to'u haama-naóraa i to te mau fenua atoa? E no reira, hoé â ta'u pa-

rau i to te tahi fenua e i to te tahi fenua, e faariro-atoa-hia mai hoi te ite a^oto taua pue fenua ra ei hoé.” (II Nephi 29:8)

Uiraa 6. Nahea te mau mea i ite-api-hia i te fenua Amerika, i te haapapuraa mai i te parau mau no te Buka a Moromona?

P. Ua na ô maira te mau taata paari e:

1- Ua tae mai te taata i te fenua ra i Amerika i te tau tahito roa, peneae i te tau no te pare i Babela.

2- Ua noho na nunaa taata rahi e piti i reira i te taimé ê, te tahi e te tahi.

3- No ô mai taua mau taata ra i te pae i te hitia o te râ, e te pae hopea no ratou no ô mai paha ratou i Ierusalem.

4- No ô mai te mau nunaa Inidia i te vahi hoé e i te metua hoé.

Ua faaite-atoa-hia teie mau manaó i roto i te Buka a Moromona, e no reira ua au te Buka a Moromona e te manaó no te mau taata haapiihia.

Parau Tauturu: Te vai ra te mau aamu parau e rave rahi no te tupuraa i te Inidia, e ua au roa te tahi no ratou i te hamaniraa o te ao nei; te tahi i te deluvi i te tau no Noa ma, e te mau parau atoa no to Iesu haereraa i te ao nei e te huru no to'na oraraa e tae noa'tu i to'na poheraa.

Uiraa 7. Eaha te hoé faufaa i fafauhia i te taata'toa te taió i te Buka a Moromona?

P. “E o teie ta'u aó ia outou na, ia itea teie nei mau parau ia outou, e ui atu i te Atua, i te Metua mure ore ra, i te i'oa o Iesu Mesia e, e parau mau anei teie mau parau e aore anei; e ia ui atu outou ma te aau hinaaro mau, ma te manaó papu, e ma te faaroo i te Mesia, na'na ia e faaite mai i te parau mau ia outou na roto i te mana o te Varua Maitai; E na roto i te mana o te Varua Maitai e ite ai outou i te parau mau i te mau mea atoa ra.” (Moroni 10:4-5)

Te Tumu no te Ino.

I TE AO VARUA, hou te faatumuraahia o teie nei ao, ua tae atura te parau i te mau varua atoa i reira, ia faatiahia te hoé apooraa i te vahi i haapaohia, e ua hinaarohia hoi ia tae ratou atoa i taua apooraa nei. A putuputuhia'i ratou, ua tuuhia i mua ia ratou te hoé opuaraa. Na te Atua hoi taua opuaraa nei.

Ua faaite mai Oia i te mau varua i reira ra e, ia haere noa ratou i mua i te ora mure ore, ia haere ratou i roto i te hoé ao tahuti e tia'i, e noaa hoi i to ratou tino ió e te ivi, no te mea ua tae hoi ratou i te hopea o to ratou haerea i nia i te purumu i te huru varua. Ua faaite atoa maira oia e, ia hoí mai ratou i mua i to'na aro ia faahuru-ê-hia ratou e tia'i, no reira e farii iho â ratou i te pohe. E e tae te reira pohe i nia ia ratou no to ratou haapao ore i ta'na ra mau ture e to'na ra mau faaueraa, e no reira atoa ia maitihia te hoé ei faaora e tia'i, ia ora faahou ratou.

I roto i taua pupu rahi ra te vai ra te hoé mau varua roo rahi e i to te Atua aniraa'tu, "Teihea ta'u e tono" (ei faaora), ua parau maira te hoé na ô maira, "Teie o vau, a tono ia'u e riro vau ei tamaiti no Oe, e e faaora vau i te taata atoa, e eita te hoé e moé, e rave papu vau i te reira, no reira ho mai na i to hanahana." (Buka Poe Taoá Rahi) Mose 4:1.

Ua parau maira râ te tahi na ô maira, "E te Metua e, ia haapaohia to Oe hinaaro, e no Oe hoi te hanahana e a muri non'tu. Mose 4:2.

I te maitiraa i ropu i na varua roo rahi ra ua maitihia te varua o tei hinaaro ia haapaohia to te Metua hinaaro, eiaha ia rave atu i to'na hanahana. Tupu ihora te riri o te tahi, e ua aratai ê oia i te tahi mau varua e rave rahi i muri

ia'na, na'na hoi i faatupu i te orure hau e ua hurihia hoi oia i rapaegu i te ao varua, riro atura oia ei Diabolo, o Satani to'na i'oa. E te mau varua ô tei pee i muri ia'na, ua riro ratou ei mau faehau no'na, ua ere hoi ratou i te tino. "E e tamaí tei nia i te raí: o Mihaela e ta'na ra mau melahi tamaí atura i te teni; e ua tamaí maira te teni e ta'na ra mau melahi. Aore râ i riro te rê ia ratou; e aore roa'tura o ratou e parahiraa i nia i te raí. Hurihia'tura hoi te teni rahi i rapae, o taua ophi tahito ra ia, o tei parauhia o te diabolo ra, e o Satani hoi, o tei haavare i to te ao atoa nei; i hurihia oia i rapae i nia iho i te fenua nei, e ta'na mau melahi atoa ua huri-atoa-hia i rapae." Apokalupo 12:7-9.

E hoí faahou râ tatou i te haamanaóraa i te varua o tei maitihia ei faaora. Ua parau maira oia i taua apooraa ra i faatiahia i te ao varua, "E hamani tatou i te hoé fenua, ia ora teie (te mau varua) i nia i te reira; e tamata tatou ia ratou, ia rave anei ratou i te mau mea atoa ta te Fatu to ratou Atua e faaue maira ia ratou ra." (Poe Taoá Rahi) Aberahama 3:24-25.

Na roto i te reira irava ua ite tatou, ua tuuhia te taata i nia i te ao nei ei tamataraa no ratou ra. O tatou nei ia te mau varua i parauhia ra, e o tatou nei hoi o tei tamatahia i roto i teie nei ao, ia rave anei tatou i te mau mea atoa ta te Fatu to tatou Atua e faaue maira ia tatou nei. Ahiri e, ta te Atua anaé ia parau i tuuhia maira e aita â ia tatou i ite i te tahi parau ua ohie noa ia tatou ia haapao i te reira. Te na ô mai nei râ te tahi irava, "te vai nei te taata ia noaa to ratou oaoa." II Nephi 2:25. (Buka a Moromona) Ahiri e parau tia anaé i nia i te ao nei, teihea ia te tamataraa? E ahiri aita e tamataraa, teihea ia te oaoa? E noaa ia te oaoa i te taata nei na roto i te rê i nia aé i te ino, oia hoi, ia tamatahia tatou ia rave i te ino, e e rê tatou i nia aé i te reira mai te rave i te maitai ua oaoa tatou i to tatou rê, ia

farerei tatou i te hoé ati e ia ore te reira, e oaoa tatou i to tatou rê, ua riro iho â te reira ei tamataraa no tatou.

I te mau mahana hoêpea nei ua parau maira te Fatu e, "E faahema te diabolô i te tamarî a te taata e tia'i, aore hoi ratou e tia i te haapao ia ratou iho, ia ore hoi ratou ia ite i te mea avaava, e ore atoa ia ratou ia ite i te mea mona." Buka Fafau 29:39.

Ua tae maira te ino i roto i te ao nei ei tamataraa no tatou. Te vai nei râ te uiraa e, te haapao nei anei tatou i te mau mea atoa ta to tatou Atua i faaue maira? Mai te mea e, aita tatou e na reira nei, aita atoa tatou e tapea maitai nei i te faufaa i horoahia mai, na tatou ia haapao. Ia ite tatou i te oaoa mau na roto i te rê i nia'é i te ino e tia'i.

— *Papahia e Toma*

Te Hoê Auri Roa.

MAI TE MEA ua taiô tatou i te hoé buka i parauhia te Buka a Moromona, ua ite tatou i te hoé mau parau i nia i te ohipa a te hoé peropheta tahito, oia hoi, o Lehi. I te matahiti 600 hou te fanauraa o te Mesia, ua parahi Lehi i roto i te oire ra o Ierusalem. No to'na faaroo e to'na tiaturi hoi i te mau faeueraa ta te Atua i faaue mai ia'na ra, ua riro oia ei peropheta mau o te Atua.

No te rahiraa o te ino i roto i taua oire o Ierusalem ra, ua faaue maira te Atua ia'na i te hoé faeueraa, oia hoi, ia haaputuputu oia i to'na utuafare, e te maa e to ratou hoi mau tiahapa ra e faaineine no te hoé haereraa. Ua haere atura ratou e na roto i to ratou haerea, ua tae ratou i te hoé peho i parauhia te peho o Lemuela. Ua faaea rii ihora ratou i reira, e i roto i taua vahi ra ua ite o Lehi i te hoé orama. I roto i taua orama nei ua ite oia i te mau mea ta te Atua i hinaaro ia faaite ia'na i te reira taime.

Ua ite atura oia i te hoé aua fenua i te rahi e te aano hoi, e mai te au i te faaitehia ua au te reira aua i te ao nei. Te reira ia te vahi no ta haaputuputuraa o te mau taata tei tae mai i nia i te fenua nei. I roto i taua aua ra, ua ite oia i te hoé tumu raau. E ua faahotu mai te raau i te hotu maitai. E taua raau nei, o te raau ia no te ora, e te mau taata o te amu i te hotu i faahotuhia mai, ua farii ratou i te oaoa, taua hotu ra o te ora mure ore ia. E te mau taata o tei amu i te reira hotu, o ratou ia o te farii i te parau a Iesu Mesia e tae noa'tu i te fariiraa i te ora mure ore.

Ua ite hoi oia, o Lehi, i te hoé pape i te taheraa i pihaiiho i taua raau ra, e mea hauá ino e te repo hoi. Na roto i to'na ite, ua papu ia'na e, o te faataa-ê-raa te reira o te mau taata maitai e te mau taata ino.

“Ite aéra vau i te hoé mea auri, e na te pae anavai ra to'na haerea, e ia tae noa mai i te raau i pihaiiho ia'u ra. Ua ite atoa vau i te hoé eá titiaifaro e te jirihao i pihaiiho i taua auri ra.” Ua faaauhia taua auri ra ei parau a te Atua, ua ite Lehi i te mau taata e rave rahi o tei hinaaro i te parau a te Atua, no reira ua tamata noa ratou i te tapea i taua auri ra. No to ratou hinaaro rahi i te faaroo i te parau a te Atua, e te farii hoi e te tiaturi atoa i to'na mau faaue-raa i tuuhia mai ia ratou ra, ua tuu mai Satani i te hoé mahu poiri, ia ore ratou e ite faahou i te eá tia. Ua ite hoi oia e, ua rahi te mau taata o tei tamau i te ohipa maitai. A tuuhia'i râ te mahu poiri, ua feaa te hoé pae o te mau taata e ua riro ratou ei feia faatau e te paruparu hoi, e no reira ua rahi ia te mau taata o tei taiva i te parau a te Atua. Ua faatia ratou i to ratou iho mau Ekalesia, e na roto i te reira ua faahuru ê ratou i te evanelia mai tei tuuhia mai e Iesu Mesia. Te reira hoi ia te tumu ua rahi te mau haapaoraa e aore râ te mau Ekalesia i nia i te ao nei i te tau hopea nei.

E te mau taata tei tapea noa i te auri e na roto i to ratou tapearaa i te reira, ua ite atura ratou i te parau mau a te Atua. E te tiaturi nei hoi ratou i te mau faaueraa ta te Atua i horoa mai i te mau taata atoa ra. O ratou ia te haapii nei i to te mau nunaa o te ao nei i te eá tia e te ravea ia roaa mai te ora mure ore.

E taió tatou i te hoé parau ta Iesu i haapii mai i to'na iho anotau. "E tomo na te uputa pirihaio; te atea nei hoi te uputa e te aano nei te eá e tae atu ai i te pohe; e rave rahi te na reira i tomo. Te apiapi râ o te uputa e te piri hoi o te eá e tae atu ai i te ora, e te iti hoi o te feia i ite atu i te reira!" Mataio 7;13-14.

—*Papaihia e Samuela*

Ua haere mai Iesu, eiaha ia parau no nia i te maramarama nehenehe, ei maramarama râ - - eiaha ia feruri i te viivii ore ia riro râ ei viivii ore.

Te Mau Parau Apî

I te fenua Iapone, no te peu o te mau taata i reira, aita i rahi te mau pereoo uira i taua fenua ra i te mau matahiti i mairi aénei. Aita atoa to ratou mau purumu e mau purumu maitai e na te reira atoa i faariro te faahororaa i te pereoo uira ei ohipa fifi. I te matahiti 1928 râ e huru rahi te pereoo uira tei hoohia e ua hamani-atoa-hia te tahi na purumu maitai i ropu i te mau oire rahi. E i teie nei ua tupu te tahi fifi i reira no te rahiraa o te mau pereoo taataahi. Ia haere maru roa te pereoo uira, e tia'i, oia hoi, eiaha ratou e horo i nia'e i te piti ahuru maile i te hora hoé e eiaha atoa e haere i raro aé i te hoé ahuru ma ono maile i te hora hoé.

I te fenua o Guatemala, oia hoi te hoé tufaa fenua ia i Amerika i te pae apatoa no Mexico, te vai nei te hoé huru tumu raau ê roa. A tapuhia'i te paa no taua mau tumu raau ra, e tahe mai to ratou pape mai te û puaatoro te huru ia hióhia'tu, e ia inu te taata i te reira eita e taa ia'na e û puaatora mau anei ta'na e inu nei e aore râ aita anei.

Te pahi manua hopea ta te hau Amerika i hamani o Roto Miti (Salt Lake City) to'na i'oa. E 600 avae to'na roa e e 10,000 tane to'na faito.

Ua itehia e te tahi mau taata paari i te ravea ia faatupu i te vavai huru rau. I Peru, oia hoi, te hoé tufaa fenua ia i Amerika Apatoa, te tupu nei te vavai uteute. I te fenua Tinito te tupu nei te vavai rearea. I te fenua Inidia te tupu nei te vavai huru ereere e i Aiphiti te tupu nei te vavai éhu. Ua manaóhia na roto i te poiraa i te tahi mau huru i te tahi mau huru e roaa mai te tahi mau huru api. Ia puahia te ahu i hamanihia i teie mau huru vavai, eita te reira e tahe.

I teie nei, e faufaa rahi to te paa aratita. Ua itehia te vai nei te tahi huru tihota i roto i te paa. Ia iritihia teie tihota e ia hoohia te reira, e roaa mai e 1,000 dala i te kilo hoé.

E utuafare hoi tei faaitehia mai nei. Te vai ra i roto i taua utuafare nei, e ono taata ia amuihia te na metua i roto. To ratou faito amui e 805 ia kilo. To te papa e 130 ia kilo e to te mama e 95 ia kilo, e to te tamaroa matahiapo e 172 ia kilo e e 17 to'na matahiti, e te piti o te tamaroa e 15 to'na matahiti e to'na faito e 142 ia kilo. Te vai atoa ra na tamahine nainai e $3\frac{1}{2}$ matahiti to te tahi e e 34 kilo to'na faito, e e $1\frac{1}{2}$ matahiti to te hopea e e 17 kilo to'na faaito. E moni rahi hoi i maúa no te hooraa maa i te mahana hoé, e ua au ia i te 50 dala moni farani.

Ua itehia te tahi ohipa api, na te pahi reva e rave. I te tahi tau e i te tahi tau ua roohia te taata faaapu i te ati, no te mea, aita e ua e ua mârô roa to'na fenua. I teie nei, ua nehenehe ia tuu te hoé afata i te oneone taurahia i roto i te hoé pahi reva e tere atu i nia aé i te mau ata no taua vahi ra. I reira, e tuu atu te taata i roto i te pahi reva i te oneone taurahia, ia topa te reira i roto i te mau ata e i reira e faahuru-ê-hia te mau ata e e topa mai to ratou pape e faarari i te fenua mârô.

Mai te matahiti 1907 mai â, ua tamata te tahi mau taata i Australia ia roaa mai te hinu no roto mai i te fenua. I teie nei ua manuia ratou i ta ratou ohipa. Ua hamani ratou i te hoé apoo, e 3,078 avae to'na hohonu, e i reira ua tahe mai te hinu no raro mai, i roto i te tuio no taua apoo ra. E tauturu rahi teie apoo hinu ia Australia, no te mea, e mea varavara te vahie i te tahi mau vahi no taua fenua ra.

I te tufaa fenua Califonia i Amerika ra, e i te afa apatoa hoi o taua tufaa fenua ra, ua taiôhia e hoé milioni e tia-hapa pereoo uira. E taihaa hoi taua mau pereoo uira ra, o te mau taata i te reira tufaa fenua i te matahiti 1928.

E maere paha tatou ia taiô tatou i te hoé parau no te pereoo auahi o tei faaroo i te parau a te taata. Ia parau te taata faatere, "a faaea" e faaea iho â te reira, e ia parau oia, "a haere i muri" e haere iho â te pereoo i muri, e ia parau oia, "a haere i mua" e haere ia i mua. E riro iho â taua pereoo auahi ei ohipa ohie na te taata faatere.

Alma G. Burton Imprimeur,
Pue Brea et de la rue Dumont d'Urville, Orovini, Papeete